

靜觀齋文稿續集

一冊

王岷源鐵龕詩草叙

昔孟子有言曰待文王而後興者凡民也若夫豪傑之士雖無文王猶興此言士之立志者然也爲詩之道何獨不然古來豪傑未必皆能詩而真能詩者人自必推爲豪傑唐之李杜宋之蘇黃其所以執耳騷壇卓然千古者豈徒以範形軌貌字摹句仿以寄人籬下哉夫亦以讀萬卷書成一家言不悖乎古人而亦不拘乎古人而已矣繼此以還世之臻斯詣者蓋鮮今乃於吾友王君岷源之詩見之曩者余官京師嘗耳岷源與其介弟海峯昆季名吾奉人士咸以爲晉之機雲宋之坡穎爲欽遲者久之其後乃緣李君芳園以識海峯又因袁君潔珊以識岷源芳園潔珊皆余生平道義交而又深佩岷源昆季者聲氣之通苔岑之契有由然已乃海峯於京師一面遽赴玉樓而岷源又以仕祿爲養親計宦轍勞勞終歲無暇竟不得賞奇析疑樂數晨夕無如何也客冬張君仙舫忽遞到岷源詩稿一冊屬爲點定余於此道毫無心得奚足以辨其得失顧以聞聲相思傾蓋如舊之人一旦捧其集而快讀之不啻造其堂而躋其域樂何如之此余所爲自忘其陋而不顧信口之雌黃者也乃岷源不以爲謬且屬爲之弁言嗟乎不文如余烏足以序岷源之詩然以相知之深如岷源又烏可以無言乎哉今夫士之所以特立獨行而

能迴超流俗者不能不效乎古人亦何能盡肖乎古人使爲士者舉凡一言一動一笑一嘖一惟
古人成法之是遵而毫無從容自得之趣其不見哂於方家也幾何今觀 岷源之詩其古音古
節清麗芊綿縱橫變化惟先民之是程謂其非漢魏非六朝非唐宋元明不得也然觀其古音古
節清麗芊綿縱橫變化惟匠心之獨運謂其即漢魏即六朝即唐宋元明而亦不得也蓋其人既
有矯然獨立之操故其詩亦自有翹然獨精之詣耳不然值風雅衰歇之時前不見古人後不見
來者何以冥心獨造方駕前人而能卓犖不羣如此哉往者袁君潔珊嘗謂 岷源爲詩須有專
攻方成家數斯言也誠學詩之準繩也然古人論詩謂三百篇中風雅各不相襲厥後作者代與
各有精神各有體貌曾無一相似者蓋善學古人者原在神而不在貌也杜子美詩云讀書破萬
卷下筆如有神司空表聖云眞力彌滿萬象在傍嗚呼吾讀 岷源之詩吾益神往於子美表聖
之言矣質之潔珊未審以余言爲何如也是爲叙

張芷青困勉齋文集序

聞之師道立則善人多自古菁莪造士棧樸成材未有不藉名師宿儒道德文章足以矜式儒林
者以裁成後進也降至今日學校如林國文一門尤爲甚重豈有荒蕪陋劣不足言文而可以言

教乎獨是聖門之教貴因其材大學之施宜當其可蓋學者之知識有淺深即教者之法程有高下圖未可執一以求之也 張君芷青昔嘗從余游讀書有夙慧凡經史古文講解別有會心獨於八股之文不甚措意及改策論後 芷青已設帳授徒適投所好凡遇攷課輒成一藝議意層出不窮滔滔汨汨奔赴腕下而又纖穠得中修短合度不設泛語枝詞余每閱之愜心貴當以爲誠可作初學之津梁也今其友人慫慂付梓名之曰困勉齋文集而復索叙於余余老大無成學殖日落何足以言爲重輕乃 芷青不自滿假殷殷請教一若非余言無以自信者爰爲誌其顛末如此抑又有爲 芷青勗者吾人學無止境文亦無止境倘本文行並重之旨有教學相長之樂異日因文見道精義入神由前清之方姚而上溯韓蘇賈董以及左國莊騷本道德之精華發文章之瑰麗經師人誦蔚爲人望如文中子之掌教河汾門羅將相如程明道之明經伊洛錄有淵源成已成物一以貫之人材之興也可立而俟之矣是則余所區區厚望也夫

奉天國文專修科競業會姓氏錄序

昔孔子有言曰君子無所爭必也射乎又曰當仁不讓於師夫爭敗德也讓美德也以夫子至德謙光恂恂規矩而顧反其道以示人何哉蓋用其爭於所宜爭之地德業可進於高明用其讓於

不必讓之時志氣將流於委靡士人有志修途固未可不察乎此也吾奉教育會於民國五年春
創立文學專修一科考取高材生七十有四人會長李君鐵珊董君奉軒不以榮爲迂腐激充國
文教員開學之際諸生以次來堂質有其文彬彬如也修業之暇倡爲競業會以增進學識涵養
道德健全身體及發展自治自動之能力爲宗旨會長李君以諸生有志上進非無意識之舉動
欣然許之並允補助各費爰於六月二十五日在本堂開會告成斯日也正副會長及本堂同人
咸集各爲演說以資策勵事畢諸生擬刊列同人姓氏錄以爲紀念而囑榮爲之序榮自揣謏陋
何足以文爲諸生昂然以諸生求學之殷進德之猛固有不可不爲一言者何則諸生以競業爲
心其不甘於退縮也可知且不甘於暴棄也更可知昔成覲謂齊景公曰彼丈夫也我丈夫也吾
何畏彼哉顏淵曰舜何人也予何人也有爲者亦若是諸生誠能本此意以勵脩修雖步趨古人
不難矣諸生勉乎哉雖然今天下競爭之禍烈矣爭名者於朝爭利者於市甚至爭地以戰殺人
盈野爭城以戰殺人盈城卒之名不得而惡歸之利未獲而害隨之德業無一成而怨毒盈於世
以一人意氣之私而屠戮千萬無辜之命嗚呼以此而言競爭則世間尙有生靈之可託哉諸生
如能博覽古今曠觀中外明乎公私之界權乎禍福之分泯血氣之爭尙義理之勇勵奮發有爲

之志存丈夫自立之心孝弟謹信濟以學文據德依仁衆之游藝爭自濯磨互相勸勉其與孔子爭與不讓之旨庶乎不悖也已他日者德成而上藝成而下各以所學播爲世用名譽之美垂於無窮是則榮所區區厚望也夫是爲序

民國五年六月二十六日

蒙古世榮仁甫氏撰

國立高等師範學校英語科同學錄序

昔人有言曰師道立則善人多是以緇帷講道被化導者三千絳帳談經聆絲竹者千數自來鈞陶士類教育英才未有不資乎師表者也獨是世皆謂古之成材也易今之成材也難古之時轉益多師今之時家自爲說是也吾獨謂古之成材也難今之成材也易古之時嚮舍不修今之時學宮林立是也然則士生斯世被辟雍鼓鐘之化發泮林芹藻之香非千載一時之嘉會哉鄙人生於數十載以前姿性愚魯又復困於帖括應試之文通籍以後濫叨詞館忝副成均每撫躬循省恒自慙不足爲多士之楷模蓋素乏專門名家之業故也民國四年秋省師範學校英語及史地專科教員缺席校長宋君憲文教務長李君華亭誤以鄙人爲識途之老馬延充此席未及半載復謬膺省教育會所設國文專修科教員之聘人之患在好爲人師其鄙人之謂歟六年春英

語科將畢業擬刻同學錄以爲紀念班長袁君仲芳來索鄙人像片將附同人之後並囑鄙人弁言於首鄙人以衰病餘生勉從事於講授且復米鹽瑣事酬應繁文日營營而無已文字之業荒蕪殆盡其何以副諸君之意哉以故遲遲而無以應命者累月乃承屬意殷拳瞻念疇昔一日之雅其於師友之誼可謂厚矣鄙人何心能勿有動於中哉嗟乎鄙人以學殖荒落之餘其於傳道得徒化民成俗之規無能爲役矣諸君年齡學力正在富強而又受文明國家累年之培植獲鴻博師儒多方之啓迪中西學術講貫靡遺他日以其所學公之於世秉鞭振鐸友教四方俾後來承學之士守吾華先民之矩矱窮西歐科學之源流振興師道蔚起人文是則鄙人區區之所厚望也夫

中華民國六年五月十五日蒙古世榮拜撰

國立瀋陽高等師範學校

史地博物

科同學錄序

民國紀元之四年秋余以無事家居就省師範英語史地兩專科國文講席越明年當事者不以余爲不肖仍延致之業將授課矣而省教育會創立國文專修科之議成李董兩會長以有夙約堅邀余主任國文講席且商之師範前校長宋君憲文彼此均以迫於公議不得已乃改就焉非

敢有所選擇去取其間也去校之日兩科諸生均有依依不忍舍之意余亦黯然神傷以此兩科多聰俊卓犖之士講貫之餘感情尤洽愧余無稍益於諸生而遽及忽以去也去年英語科畢業諸生刻同學錄譜序於余爲誌數言今歲史地科畢業刻同學錄仍譜序於余余雖謫陋曷敢以不文辭因即平生所希冀於諸生而爲諸生勗者聊相爲言之昔孔子歷聘七十二邦因魯史而作春秋太史公周行天下紬金匱石室之藏而成史記孔子又嘗刪詩書記山川谿谷禽獸草木之異名以及九州四海土壤財賦之差等太史公既述陶唐以來至於麟止而復爲書八章以誌河渠平準凡治水明農各端無不畢載說者謂春秋一書文成數萬其指數千萬物之聚散皆在春秋太史公繼之貫穿經傳馳騁古今我國史地二端實於此稱盛軌焉唯是世變日積而日蕃輿圖亦愈拓而愈廣古今中外有非拘守陳編所能會其通者今諸生歷數載專家之講授殫平生苦志之研求其必各有心得徵諸實用無待明言矣尤願諸生學成而後精益求精不惟考歷史之記載可以知地理並可以詳文明進化政治之端不惟稽輿地之沿革可以見史學並可以求物產豐饒格致之事然則史地一科苟能融會貫通而其他之科學有不難觸類而及之者由此集衆長而成絕學以之成己以之成物以繼既往以垂將來爲史冊地球上增我國莫大之

光榮是則鄙人區區之所厚望也夫

中華民國七年六月

蒙古世榮拜序

國文專修科第一級同學錄序

民國建元之五載吾奉教育會鑑於文學之日非倡議立國文專修一校而延鄙人主任國文講席正月經始四月開校考取高材生七十餘人爲第一級入校之始彬彬儒雅甚盛事也當事者以爲喜暑假後又考取高材生一班數亦如之爲第二級國文之任錦縣王敬生先生主之閱三學期當事者困於財不得已乃歸併於省師範學校第一級國文仍延余主之第二級則延北鎮蕭煥章先生任之又已三學期矣今值歲杪考試畢業諸生輯同學錄而請序於余嗚呼余以謫陋謬蒙吾鄉士紳推舉濫叨修脯虛擁皋比清夜撫心愧恨無地尙何言哉迴思此三年內當事之期望於鄙人與諸生何如即使竭盡吾才惟日孳孳尙恐未能稍副其萬一而況以材力之竭歷世故之紛擾舉平日之所存於心者曾不能達其一二焉其不足以滿人之所望與已之所期者可知矣以鄙人之限於天資人事不能自克而無以償其平生無窮之願則知諸生有志未逮而無以達來學之初念者與鄙人當亦相去不遠也學然後知不足教然後知困豈不然哉雖然

鄙人年將遲暮退處衡門可不再自誤以誤人諸生年富力強正在有爲之日宜思爲學之道憂以終身樂以終身勿以畢業爲學成之候而以畢業爲始事之基三年中已講習者思如何研精而光大之三年中所未講習者思何如博覽而擴充之爭自濯磨互相切磋風雨晦明終勿忘此敬業樂羣之旨則書所謂念終始典於學厥德修罔覺者可以無愧矣由是則或出仕而爲人長或立教而爲人師亦必名重當時澤被來裔使人指而稱之曰某某者當日某校某科之所肄業也庶以慰當日設科者之初心而鄙人卽閉戶家居亦聞之而有餘幸矣諸生明達當不以鄙言爲河漢也是爲序

民國七年十二月國文教員蒙古世榮撰

國文專修科第二級同學錄序

天下有畢生求之而不容有一息之或間者其惟學問之一途乎昔孔子以天縱之聖生而知之安而行之似無待於下學上達俛焉孳孳矣乃其自述生平由十五志學以至七十從心其間歷而立不惑知命耳順蓋無一日不在學之中亦無一日不在問之中故其答哀公之問政而終告之曰博學之審問之又曰有弗學學之弗能弗措也有弗問問之弗知弗措也孟子亦曰君子有

終身之憂所憂維何曰不如舜之爲法於天下可傳於後世而已然則士君子日就月將學有緝熙於光明者蓋有由矣後之學者不知遜志時敏乃欲以旦夕之功不勞而獲之豈可得哉鄙人學植荒落而年復遲暮回思少壯之時倏焉已過少不努力老徒傷悲悔無及已乃自解組歸田邦人士謬以爲識途老馬延主師範各科講席者三載有餘往年英語史地兩科以及文科一級考試畢業諸生爲同學錄之刻皆問序於鄙人以資獎勵今文科二級畢業諸生又以此爲請鄙人雖不文敢不出一言以爲諸生勗乎諸生夙具根柢又經學校三四載之栽培高明沈潛各有所詣自此將離求學時期而爲任事時期矣讀聖賢書所學何事爲師爲長當無難勝任而愉快然鄙人仍望諸生以作事時期爲求學時期一事未知必求其知一理未明必求其明蓋求學時期僅求諸耳目之前其爲學猶麗於虛不若任事時期必求之身心之際其爲學乃徵諸實也諸生如能思文王之純亦不已效孔子之好古敏求以修己爲治人之本卽以行義爲達道之資明德新民一以貫之其於窮理盡性化民成俗之規庶幾有合也夫是爲序

民國八年六月瀋陽蒙古世榮撰

劉殿選先生六十壽言序

今夫人所以於天地之間而卓然貴於萬物者何在乎夫亦以篤於倫常而已矣獨是有男女然後有夫婦有夫婦然後有父子有父子然後有君臣此誠天地之常經古今之通義有不可一日以紊者至於昆弟朋友之間或如壺觴之吹或如參商之戾或如苔岑之契或如萍水之逢似宜各觀其所遭以爲因應而不必以人事強爲彌縫者矣然唐虞君臣吁咈之際所常兢兢致意者不曰敬敷五教則曰天叙五典是於五者之中初無軒輊重輕之處降而求之三百篇中關雎鶴鳴其言夫婦詳矣鹿鳴天保尤爲君臣之盛軌乃其間勞使臣則興懷於苞栩苞芑是則移孝作忠君臣父子誠有相爲表裏者然而其後即繼以常棣伐木二什爲燕兄弟朋友之章常棣之六七章曰兄弟既具和樂且孺兄弟既翕和樂且耽伐木之首章曰嘒其鳴矣求其友聲相彼鳥矣猶求友聲矧伊人矣不求友生神之聽之終和且平古聖人立人道之極而其所以垂教萬世者抑何其纏綿而篤摯如此哉迄今載詠篇章未嘗不感喟流連而油然思人倫之重也吾友劉子丹主政爲吾鄉 殿選封君之介弟以名孝廉於前清光宣時官京師十餘年子丹博涉經史於書無所不讀性好友結納多名流時余亦以菲材濫廁詞垣同居京邸日以拘迂不敢輕言投報

而獨於子丹有神契相見時輒笑言忘倦幾不知日之蚤暮也爰是與李大令合乾同爲歲寒三友之盟光緒季年十一月某日值 殿選公周甲之辰子丹爲 殿選公行事節略徵同人祝嘏之詞始知子丹乃孝弟中人爲心折者久之旋得都中同人詩文共數十百首余亦爲七古祝詞一章以誌欽仰迄於今忽忽者已七八年矣世運滄桑國體屢變民國初元先後歸里余以無狀僅權學務一載子丹亦以謀生之故樵權政者數年所至之處公餘稍暇陶情詩酒結客爲歡今冬余以窮居無聊濫膺師範講席之聘子丹亦以卸篆孤山寓居省邸朝夕往來握手言歡依依如往日燕市歌哭時也談次出近日所爲古近體詩若干首清麗芊綿條然塵表而其古體詩言及身世暨友朋離索之感尤爲悱惻芳芬沁人心脾復出往日同人所爲壽言付諸梓人並囑余爲弁言於首以爲紀念甚矣子丹之篤於倫紀而於昆弟朋友之間如常棣伐木之詩之所詠言念焉而刻不能忘也嗟乎余不天三齡失怙稍壯又失恃獨行踽踽幾不知天倫之樂爲何事今復以朝局變遷退居田野蓋倫常之缺陷多矣一念及子丹之白頭兄弟友愛一堂則不禁潸然出涕以悲蓋悲其遇之不能如子丹也然一念及子丹之白頭兄弟友愛一堂又未嘗不欣然破涕以慰蓋慰其相知如子丹相愛如子丹相愛如子丹未始不可以友朋而兼兄弟之樂也昔司

馬牛謂人皆有兄弟我獨無子夏慰之曰君子敬而無失與人恭而有禮四海之內皆兄弟也余以不肖誠不足以友天下士然以子丹之天性純篤風義是敦而又謬相引重宜其不後於古人矣此余所以臨文嗟悼俯仰無端而不自知其悲喜之交集者也雖然常棣伐木之詩皆成周休明時作也其後世道衰微小宛之詩又言曰各敬爾儀天命不又又曰夙興夜寐無忝爾所生鄭國之風有言曰風雨如晦鷄鳴不已既見君子云胡不喜我輩年將遲暮憂患餘生獻曝愛日之誠無復可得而惟此姜家枕被之歡季子縞紵之誼相與珍重愛惜懷詩人敬儀無忝之提撕念風雨故人之警欵庶於倫常之際稍彌其遺憾焉然則此壽言一編其勿視爲雪泥鴻爪之緣雖視之如拱璧百朋焉可也質之子丹當必有心心相印者遂本此意而爲之序

余生平因感觸者有數次痛淚一爲癸巳中秋折桂之時一爲戊戌長子成婚之日爲親也一爲戊申十月 兩宮晏駕讀遺詔時爲君也今爲此文亦復痛不可遏蓋百端交集矣

子丹謂規模魄力不讓若文又謂真切懇到余以謏陋何敢比擬古人然於真切懇到四字或尙得其髣髴耳民國四年冬至後四日仁甫自識

中國海軍地理形勢論序 代

中國輿地之書於經則有禹貢於史則有河渠外此山經水注以及各史之志地理者指不勝屈已詳哉其言之矣然或分疆畫界或溯委窮原於十二州之山川雖可得其大凡而於行軍用兵戰勝攻取形勝扼要之區尙多缺焉未講也況自近代以來環球各國輪軌交通競爭逾烈其所以爲整軍經武之方者不惟稱長於域中兼思爭雄於海上此海軍根據地所以尤爲汲汲也乃中國自前清洪楊構難金陵曾彭諸公創立水師爭勝江湖是以克底於成功其後復立海軍軍署思欲漸次興舉及甲午中東一役海軍殲焉幾不克振而所謂形勢扼要之區反爲他人所據吾國或且茫然不覺熟視之而若無覩也吁可慨已吾師丁小川先生績學士也曩年肄業京師大學宏識孤懷獨高儕輩課餘之暇著有兵書數種中國海軍地理形勢論此其一也附圖一冊論既詳核圖尤精細眞講求戰事者之要務也乃先生以他事去校鬱鬱不得志所著書亦未示人人無知者鼎革命後出關東遊吾校校長雅重先生乃聘爲史地科教員先生誘掖殷勤誨人不倦暇日乃出斯編示生等生等受而讀之欽佩無已知先生蘊蓄宏深偶出緒餘必有造於吾國乃商請先生將此書鐫板印行公諸天下庶幾不負所學先生慨然許之並給板權於生等嗚呼若先生者可謂勇於爲義者矣獨是以先生之識之力不能登明堂侍武帳與孫吳輩上下其

議論以灰盤指畫天山如聚米圖成隴蜀以甲兵威天下乃僅於風雨晦明手此一編擁皋比以與生等開陳大義指示迷途誠不免爲先生惜然由此書之成非但擣昧無知如生等研究先生茲編可以不出戶牖而知天下即素留心於寓內大勢者觀先生此書亦益開拓見聞增長識力以爲可於鎗林彈雨之中駭浪驚濤之地而如在目前如示掌上矣是先生之志不行於昔或行於今不行於今必行於後無疑也或者他日困極而亨如非熊之遇文王臥龍之逢先主推轂登壇指揮而定未必非此編爲之嚆矢也此則生等區區屬望之忱所禱祀以求者矣 先生聞之或亦莞然一笑乎書既成爰序其原委如此民國四年十月日師範全班學生百拜謹序

撫順佟氏族譜序

往嘗讀漢書鄧禹竇融等傳見其雄畧奇偉乘時利見一時功名垂於竹帛而其子若孫聯姻帝室繼繼繩繩富貴累世不絕雖至朝市變遷玉步屢改亦復更盛迭貴而無窮已未嘗不嘆其祖德宗功貽謀之遠與流澤之長也他若金張世胄王謝家風雖皆豔稱千古然不過數十年或百餘年而止耳若歷數百年或千餘年而紆青拖紫前後相望者恐合全史不多見也乃今竟於我撫順佟氏遇之矣佟氏本遼東人居佟佳以地爲氏後遷撫順遂世爲撫順人以貴雄一方常明

之中葉篤生異人代有顯者明末朝政不綱適 清太祖崛起東方功德日盛而勸惠公養性忠烈公養真遂杖劍軍門傾心歸附隸漢軍正藍旗屢從征伐所向有功而其羣從子弟亦皆文武兼資濟濟從龍之選由是效命疆場敷歷中外者甚衆其後襄勤公圖賴端純公國維父子均以皇后之父封一等公襄勤公女 孝康章皇后實誕生 聖祖仁皇帝較之周家大任太姒未遑多讓也而忠勇公國綱以國舅一等公從征噶爾丹以力戰歿於軍其子鄂倫岱襲之忠勇公次子大司馬法公海淵若其孫少冢宰介公福受茲均以翰苑起家清望爲文臣冠其餘封伯封子封額駙及拜爵予諡者尤不可以一二數蓋門楣鼎盛極矣雖其間亦有與年大將軍同罪如隆科多者然卒以先人功烈獲邀寬典而其奕葉簪纓綿綿延延蓋至於今又數百年於此矣榮忝生桑梓之邦自幼傳聞夙深敬慕及長稍讀詩書見夫志乘所載隆規茂矩俊烈豐功真覺先民軌範去今未遠通籍後與鄉里大人先生遊始識玉都護寶森印書者時年已七十矣老成純謹諳於政事望而知爲耆碩尤工心計復以財雄一時亦可見其傳家居室之有道矣近十餘年來復識佟德一印兆元者以師範高材生選省議會議長才識冠一時今爲鴨綠江採木公司理事長心精力果日起有功上峯深倚重焉此後前途遠大夫何能測其所至明德之後必有達人古